

024 阿媽的菜園仔 //曾裕樞 (luí) (04/07thk改寫)

阮阿媽是一個(ê)慈愛擱骨力的序大人，平常時仔，伊定定去的所在就是伊的菜園仔，遐(hia)是伊希望的所在，遐是伊運動的所在，遐嘛是伊變魔術的所在。

阿媽的菜園仔無偌大，差不多一間教室大，有種茄子、hiam薑仔、甕菜、白菜、菠菱仔(pue-líng-á).....足濟(tsē)種足濟種的菜。阿媽欲掘菜股，掖(iā)菜子、沃水、落肥、副(khau)草，空課(khang-khuè)濟kah做攏袂煞。原本是一塊拋荒的土地，經過阿媽的妙手恰拍拚，這-má已經變做一股一股的菜股--矣。掖--落的菜子無偌久就發芽，沃水了後直直大穰，遐的菜相爭大穰，拚看啥人較gâu大，實在有夠趣味--的。

阿媽嘛有種菜瓜，伊買菜栽來種佇塗(thôo)--裡，落粗糠恰雞屎肥，搭棚仔予(hōo)伊旋(suan)藤，愈發愈長，愈發愈濟，閣來就開大大蕊黃色的花，蜂仔恰細隻蝶--攏會來採花蜜。無偌久就生出菜瓜條仔，吊kah規棚仔攏是，對棚仔跔看--過，大大細細的菜瓜，毋知有偌濟(tsē)呢？臭腥龜仔、草蜢仔、菜蟲嘛來鬥鬧熱，阿媽的菜園仔變kah像花園，對遠遠看過去，ká-ná一塊彩色的花仔布，有青色的、黃色的、茄仔色的。我共(kā)阿媽講：「阿媽，你ká-ná咧變魔術--咧，手比比--咧，菜園仔就變出足濟無仝款的菜。」

阮tuà土城，歇(hioh)暍日才轉去阿媽兜，我恰小弟上愛去菜園仔tshit-退，jiok草蜢仔、掠金龜仔，要kah毋知人，小弟會tuà菜股放尿，伊講：「欲共阿媽鬥沃肥」。阿媽會趕緊去提一寡(kuá)水共放尿的所在沃沃--咧。阿媽講「若無，會鹹鹹--死。唉！恁遮的囡仔生雞卵的無，放雞屎的有--啦。」菜園仔的菜愈來愈嬌(suí)，愈來愈大穰，攏是阿媽愛心照顧的結果。

阮若欲轉去土城的時陣，阿媽會挽足濟菜予阮紮--轉來。阿媽講：「家己種的菜無農藥，食了較安心。」阮若食著阿媽種的菜，就想著會曉變魔術的阿媽，閣較感受著阿媽對阮的疼心恰愛心。(約620字)